

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02 i 13/03), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i čl. 16. i 38. Pravilnika o licencama ("Službeni glasnik BiH", broj 38/05), Državna regulatorna komisija za električnu energiju, na sjednici održanoj 28. juna 2007. godine, donijela je

ODLUKU O IZDAVANJU LICENCE ZA DJELATNOST NEZAVISNOG OPERATORA SISTEMA

1. Izdaje se licenca "Nezavisnom operatoru sistema u Bosni i Hercegovini" Sarajevo za obavljanje djelatnosti nezavisnog operatora sistema.
2. Licenca iz tačke 1. ove odluke izdaje se za period od 1. jula 2007. godine do 11. jula 2012. godine.
3. Sastavni dio licence su Uvjeti za korištenje licence za obavljanje djelatnosti nezavisnog operatora sistema.
4. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

Obrazloženje

"Nezavisni operator sistema u Bosni i Hercegovini" Sarajevo (u daljem tekstu: NOS BiH) uspostavljen je Zakonom o osnivanju Nezavisnog operatora sistema za prijenosni sistem u Bosni i Hercegovini ("Službeni glasnik BiH", broj 35/04, u daljem tekstu: Zakon o osnivanju NOS-a). Svrha osnivanja Nezavisnog operatora sistema, njegove funkcije i ovlaštenja utvrđeni su članom 5.2. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02 i 13/03, u daljem tekstu: Zakon o prijenosu), te čl. 2. i 7. Zakona o osnivanju NOS-a.

NOS BiH je od 12. jula 2005. godine korisnik *privremene licence* za obavljanje djelatnosti nezavisnog operatora sistema, registarski broj: 05-28-164-8/05 izdate na period od dvije godine. Ispunjavajući obavezu iz člana 38. stav 2. Pravilnika o licencama ("Službeni glasnik BiH", broj 38/05) da u roku od šest mjeseci od dana registracije u Registar pravnih lica BiH zatraži od DERK-a izdavanje licence kojom bi bila zamjenjena privremena licenca, NOS BiH je u ovom smislu podnio zahtjev pod brojem: 05-28-007/06 od 11. januara 2006. godine. Zahtjev je podnjet na obrascima propisanim od strane DERK-a.

Shodno članu 7. Zakona o prijenosu, za aktivnost nezavisnog operatora sistema potrebna je licenca DERK-a a podnosilac zahtjeva je dužan zadovoljiti uvjete i kriterije za dobivanje licence koje svojim pravilima i propisima odredi DERK.

Ocjenjujući kompletnost podnijetog zahtjeva DERK je u dva navrata podnosioca obavještavao o nedostacima istog čineći to svojim aktima broj: 05-28-007-2/06 od 7. februara 2006. godine i broj: 05-28-007-6/06 od 21. septembra 2006. godine i zahtjevajući da se zahtjev upotpuni u skladu sa čl. 18. i 19. Pravilnika o licencama. Po primljenim upozorenjima NOS BiH je dostavljao dodatnu dokumentaciju dopisima broj: 1592/06 od 5. septembra 2006. godine i broj: 2307/06 od 3. oktobra 2006. godine.

Pregledom naknadno dostavljene dokumentacije konstatovano je da su podnijeti svi relevantni dokumenti koji DERK-u mogu pomoći da razumije, razmotri i donese odluku o podnijetom

zahtjevu o čemu je u smislu člana 8. stav 2. Pravilnika o licencama obavijestio podnosioca zahtjeva svojim aktom broj: 05-28-007-8/06 od 24. oktobra 2006. godine. DERK je pri tome uvažio tvrdnju podnosioca zahtjeva izraženu dopisom broj: 2309/06 od 5. oktobra 2006. godine da će Poslovni plan biti spreman do kraja 2006. godine i kao takav biti naknadno dostavljen DERK-u. Nastavak postupka je to i potvrdio.

Po pregledu i provjeri svih dokumenata u pogledu njihovih formalnih elemenata, DERK je pristupio razmatranju zahtjeva. Najprije je u skladu sa obavezom iz člana 10. Pravilnika o licencama, 14. novembra 2006. godine objavio u dnevnim novinama i na svojoj internet stranici obavijest za javnost sumirajući zahtjev za licencu i odredio rok do 30. novembra 2006. godine za dostavljanje komentara javnosti na podnijeti zahtjev za izdavanje licence i dostavljanje zahtjeva za sticanje statusa umješaka.

DERK konstatuje da nisu dostavljani komentari u vezi podnijetog zahtjeva za dodjelu licence, niti je na javni poziv DERK-a bilo koje lice kandidovalo svoj interes da učestvuje u postupku u svojstvu umješaka.

DERK je izvršio provjeru podataka, dokumenata i informacija priloženih uz zahtjev i utvrdio da su isti tačni i potpuni, te da u svemu svjedoče o svim tehničkim, pravnim, finansijskim, organizacionim, kadrovskim i drugim mogućnostima, kapacitetima i sposobnostima podnosioca zahtjeva da ispuni sve kriterije, uvjete i standarde propisane zakonom i pravilima i propisima DERK-a za dodjelu licence. DERK je stoga pripremio Nacrt uvjeta za korištenje licence za obavljanje djelatnosti nezavisnog operatora sistema.

Ovaj dokument je od 6. juna 2007. godine učinjen dostupnim podnosiocu zahtjeva, kao i svim drugim zainteresovanim članovima javnosti, a omogućena im je prilika da iznesu svoje komentare i na općoj raspravi održanoj 14. juna 2007. godine u sjedištu DERK-a u Tuzli. Na ovoj raspravi NOS BiH je izložio komentare koji su naknadno razmotreni te je DERK, dopisom broj: 05-28-007-14/06 od 19. juna 2007. godine, podnosiocu zahtjeva dostavio Izvještaj sa održane opće javne rasprave i Prijedlog uvjeta za korištenje licence, u skladu sa članom 16. Pravilnika o licencama.

DERK je omogućio podnosiocu zahtjeva da i o ovim dokumentima ponudi svoje konačne komentare do 26. juna 2007. godine. Podnosilac zahtjeva je svojim aktom broj: 2017/07 od 26. juna 2007. godine potvrdio da Prijedlog uvjeta za korištenje licence, kao sastavni dio ove odluke, uvažava većinu njegovih komentara.

Na osnovu naprijed izloženog, odlučeno je kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-007-16/06

28. juna 2007. godine

Tuzla

Predsjedavajući Komisije

mr Vladimir DOKIĆ